

## Wäschen - haut

- Langweileg! huet de Ralph gekeimt. Dee ganze Moie war hien duerch d'Haus getrollt ouni ze wëssen, wat e sollt mat sech ufänken. D'Mamm war der Meenung, hien hätt an der Lescht zevill virun der Paystation gehaangen, an dunn hat de Papp him nach den Handy ofgehol. Hie sollt mol ronderëm sech kucken, vläicht wär et jo an der richteger Welt och ganz flott.

Domat war de Ralph net averstanen. Hie souz am Keller um Buedem virun der Wäschmaschinn an huet nogekuckt, wéi säi gesträiften T-shirt mat der Nummer 10 um Réck zesumme mam Papp sengen Jeans an e puer Bluse vun der Mamm am Schaumwaasser hannert där ronner Fënster ronderëm gewänzelt ass. Dat war bal wéi bei deem Spill, wou hien, als blo-roude Samurai, misst mat gréngen a schwaarze Waasserongeheier kämpfen. Just, hei hat hie keng Manette. Wéi schiel war dat dann!

- Ah, hei bass du! sot d'Mamm, déi grad mat enger Maandel voll Dicher a Bettwäsch erofkoom.

- Langweileg! huet de Ralph g'äntwert.

- Ruff mech, wann d'Maschinn fäerdeg ass, da kann ech déi nächst amachen.

- Wouhier weess ech dann, ob se fäerdeg ass? huet de Ralph gefrot.

- Nom Schleideren hält de Programm vum selwen op. Du kanns d'Wäsch dann alt schonn eraushuelen.

- Schleideren? huet de Ralph gemault. Dat ass dach keen Auto!

- D'Mamm huet gelaacht an de Kapp gerëselt.

- Oh Ralph! Dat huet näischt mat engem Auto ze dinn. Zum Schluss vum Programm gëtt d'Wäsch ganz séier gedréint, fir dass d'Waasser ofleeft. Dann drëpst se net méi, wann ee se raushëlt. Dat nennt ee Schleideren.

- An da kann ech mäi gesträiften T-shirt endlech nees undinn? huet de Ralph gefrot.

- Nee mäi Jong, huet d'Mamm g'äntwert. Da mussen däin T-shirt an all déi aner Saachen opgehaange gi fir ze dréchnen, an



duerno müssen se gestreckt ginn.

- Mamm, du weess dach, dass dat mäi Liblings-T-shirt ass. Firwat konnts de deen dann net éischer wäschen?
- Sou einfach ass dat net. Virdrun huet de Papp seng Hiemer gewäsch. A well déi all esou hell sinn, konnt hien däin T-shirt net matwäschen, soss hätt deen ofgefierft. Kanns de dech erënnere, wéi deng Schwëster eng Kéier aus Versinn eng schwaarz Strëmp zesumme mat hirem neie rosae Rack gewäsch hat?
- Wéi kënnt ech dat vergiessen, sou wéi hatt Kreesch gedoen huet?
- Tjo, mat Fale léieren d’Kanner goen. Dat war rëm ee vun der Mamm hire Spréch. De Ralph wousst net genee, wat domadder gemengt wier. Dat huet hien och net interesséiert, hien hat aner Suergen.
- Wéini däerf ech erëm... huet hie probéiert ze froen. Mee d’Mamm war schonn an der Trap.
- Vergiess net, mech ze ruffen!

No enger Zäit huet d’Wäsch ugefaangen esou fest ze dréinen, dass déi ganz Maschinn gewackelt huet. De Ralph huet sech virgestallt, wéi hien, als bloe Samurai, d’Monstere ronderëm géif schleiden an dobäi ëmmer misst oppassen, fir net selwer zerquëtscht ze ginn.

- Ah, hei bass du! Dës Kéier war et de Papp, deen déi interessant Entdeckung gemaach huet.
- Ech gesinn, d’Wäsch ass fäerdeg, stellt hie fest. An hei steet schonn déi nächst. Da komm, mir zwee maachen déi alt an.
- Musse mer dofir wierklech zu zwee sinn? huet de Ralph gegrommelt.
- Oh Ralph! Du gëss net méi domm dervun.

Dat war elo ee vum Papp senge Spréch, déi ware méi liicht ze verstoen. De Ralph huet sech esou lues gehuewen, wéi wann hien 80 Joer hätt an 100 Kilo géif weien. Hien huet eng eidel Maandel bei d’Maschinn gezunn an déi fäerdeg Wäsch dragedruecht.

- Dro déi mol an de Gaart bei d’Wäschlängt, huet de Papp kommandéiert. De Ralph huet gefollegt, net ouni Hannergedanken. Vläch war jo een « Deal » dran, wéinst dem Handy.
- An elo stéchs de déi Dicher an d’Bettwäsch an d’Maschinn. Dat sinn alles hell Faarwen, also pass op, dass net nach eng schwaarz Strëmp...

- 
- Ech weess! De Ralph huet d'Ae verdréint. Ech kennen d'Geschicht vum der rosae Rack.

De Papp huet Wäschpulver uewen an ee klengen Tirang geschott an un engem Knäppche gedréint.

- Dat hei ass fir de Programm anzustellen. Virun allem d'Temperatur ass wichteg. Fir Kleeder ginn 30° duer, wa se net zevill knaschteg sinn. Dat spuert Energie. Fir d'Bettwäsch stelle mer se awer léiwer op 40°.

- Wat mécht dat da fir en Ënnerscheed?

- Wat d'Temperatur méi héich ass, wat d'Wäsch méi propper gëtt. Mee dat hänkt awer och vum Stofft of. Virun allem bei Kleedungsstécker muss ee gutt oppassen. Bei 60° häss de däin T-shirt duerno net méi kënnen undoen, well da wär en agaangen.

De Ralph huet op de Knäppche geluusst. Wéi fënnt een dann iwuerhaapt eraus, wéivill Hëtzt esou een T-shirt verdréit? Seng Mamm wäert jo alles richteg gemaach hunn...

- Kuck net esou skeptesch! laacht de Papp. Do gëtt et ee ganz einfachen Trick. Komm mat an de Gaart, dann hänke mer alles op an da weisen ech der et.

De Papp huet dee bloen T-shirt aus der Maandel gezunn. Dee war nach ëmmer blo a rout gesträift a war och net méi kleng ginn. Bannen houg eng Etikett mat allerhand Zeechen.

- Däi wäertvollen Tricot ka mat héchstens 40° gewäsch ginn, gehéiert awer net an den Trockner. Dofir däerfs du en elo ophänken!

De Papp huet dem Ralph säin T-shirt an zwou Klameren dohigehalen. Hien huet misste grinsen, wéi säi Bouf sech geplot huet, fir dat Déngen op der Wäschléngt un d'Halen ze kréien. Grad wéi hie fäerdeg war, stoung op eemol d'Laura, ee Meedchen aus der Noperschaft, am Gaart. Hatt hat ee rouden T-shirt mat enger wäisser 17 drop an ee Ball ënnert dem Arem.

- Kënns de mat an de Schoulhaff? huet d'Laura gefrot.

De Ralph huet säi Papp ugekuckt, deen huet gelaacht.

- Da sprang! An huel dat hei mat, fir wann eppes ass!

Wéi de Blëtz huet de Ralph no sengem Handy gegräff a sech mam Laura duerch d'Bascht gemaach.

---